

國史館藏

清代傳記叢書




明文書局印行

清代傳記叢刊・綜錄類⑦
周駿富輯

國朝耆獻類徵初編
(五)

卷三八〇至
卷三八八

(清)李桓輯



明文書局印行

20

國朝耆獻類徵初編卷三百八十目錄

孝友六

魏世傑

吳紹宗

賀如珩

趙清

嚴廷璜

陸承祺

陸承祚

陸承烈

陸敷樹

馬純錫

程世顯

朱壽命

楊獻恆

周永

子澁

王晉錫

王德麟

胡名芳

黃農

吳氏四孝子

劉宏甲

劉宗洙

劉恩廣

劉宗泗

卷之三

177-004

國朝耆獻類徵初編卷三百八十

通奉大夫前署江西巡撫江西布政使司布政使湘陰李桓輯

孝友六

魏世傑

世傑字興士父諱祥母邱氏大父徵君諱兆鳳大母曾氏曾大父諱嘉謨妣劉氏庶妣黃氏徵君黃出也兄嫂生子凡七八人唯世傑成人年二十八補邑弟子員性亦不好時文而嘗從子學古文辭頗能得古人門戶所著有梓室文彙數十篇詩百餘首已版行歲丁巳十月十四日伯兄旣爲韓大任所害時予客廣陵世傑從季父夜奔上鄉奉遺體以歸殮於翠微山麓其初譌言不一及細

驗私處皆合世傑於是長號踊而呼曰天乎天乎拔佩刀自刎人
強持之者再遂握拳擣其胷死血入少腹腹痛僂不能立呼號二
十日死蓋十一月初五日也距其生年三十三先是三年嫂以病
終翠微山自初喪至虞世傑直坐立處淚滴地下皆成泥至是又
以死殉父世稱爲孝子不誣云世傑幼慧五六歲應對進退如成
人負志氣好大言其父每每戒抑之嘗隨予臥起登牀必自摺疊
所著衣天明白著之襟帶楚楚不亂家人皆嘆羨長有才具能四
應子每謂勺庭之門他日可獨任事者傑其選也傑娶盧氏文學
君士選之長女太常公遠之曾孫也生女一許字李君竹孫之子
某子三家桂家駒家棟子得訃奔還慟絕念諸孫無師身自教

之爲句讀訓詁明年更就外傳家駒年八歲醇飭有成人度于甚
愛之七月病殤予視殮山下夜深不得坎土而埋時吾兄父子皆
停棺山麓爲斜屋覆之是夜舉榼入屋中祖孫三世橫棺交錯一
慟腸爲之斷傑生乙酉當崇禎甲申後世大亂襁褓以走山谷者
數年及其歿又當東南之變奔走險阻無甯處蓋其生與世亂爲
終始云今舉喪附葬吾兄之側因次其生平而爲之銘曰
汝以孝成名其不爽矣汝德業未成而死則罔矣汝魄依父母以
恟恍矣汝與父罹其凶先世之德汝後嗣其饗矣言信而有徵石
視諸掌矣

右墓誌銘魏禧撰

余乙酉來甯都丙戌興士生始晬坐余搢上匍匐就口食眼光奕奕射人爲兒益慧言次見鋒稜余篤愛之如所生比長成立余爲評序其古文詩版行推爲易堂後輩第一人三十年不遷也已未春余猶遠客長兒厚德奔告始聞東房遇害興士以痛父踵歿時山居客滿坐余失聲長號痛不能止客語或侵東房余推其心辨之甚力比歸悉聞事曲折且多湊誤益心哀之而興士痛父志不能白欲以頸血濺皇天后土俾天下後世疑而哀之以求白厥父之志謂閭閻之可排而豐隆蜚廉之可挾以昭布天下視其身如蟲蝨妻子如蜉蝣醯醢曾莫之顧此孝子之志也余嘗欲爲興士作誌銘未就叔子旣成示余因記其後余與邦士暨叔季之言令

自欺其心以欺天欺世雖父母不敢出異日當必有知東房者而興士固未死也

右書墓誌銘後彭士望撰

魏世傑字興士又字耕廡甯都人少篤學能古文有荅北平王崑繩書曰庚戌除夕世傑再拜致書崑繩足下歲癸卯家叔父江淮歸知足下伯仲姓字乙巳冬家嚴君季父歸自京師則又備知之季父入都門足下夜臥牀下談說往往見朝光入室中傑慕望足下願與定交若不能終日反視平生抑懼不可也月初家叔父再由淮上歸傑遽問近況乃出手書相示喜甚愧甚傑身爲易堂子弟承家嚴君諸父義方之訓微名或得呼於大人君子竊益戰懼

無有已時思古人建業成功名於時當世之人被其光烈想望其風采此在童穉間必能嶄然自異雖軼軻困抑不能蚤遇於世而自厲其志識就正師友相切劘堅忍做惕數十年如一日則終必有識之者故功名仕宦之境人未易遽得得亦未足爲豪傑士稱蓋其志其力不徒見於得志有爲之時而貧賤憂患憤鬱困苦危亡之日已早見之也陳蕃謂大丈夫安事一室王曾志不在溫飽初若好大言自矜後皆能自樹立不負平生之言而士人平居牽繫妻子取適於口體一身卽安餘不復知賢者弄毛錐雕蟲之技誦詡然欲以文章自名疑若拄天地塞今古而不可磨滅嗚呼誠可笑已傑耳目所聞見類多有志之士然飢寒勞苦備嘗或不勝

窮愁又或苟完居室飽煖逸豫積之歲月於是聽其論議以察識
其意考其行事則非復錚錚少年時志槩矣傑用是恐懼愈至念
天地閒事固多危疑艱難榮辱所關利害禍福所倚伏曾未嘗一
試其平生得失之故萬一不足自信而不敢妄言求異於人且願
交天下士也語曰閉戶造車出門合轍此其事非易言愚嘗以爲
不能明其故徒足誤人而虛矜天下才智之士諸葛公抱膝隆中
房杜諸賢受業河汾時未當天下之任人謂其寂然閉戶而無所
爲耳豈知其心於天下時勢人情之安危機事之先後孜孜然若
斲輪之甘苦疾心求得於心應於手以合乎軌度者非一日之故
夫豈師心自用而能與天下事哉且夫士之出處固非必窮達之

謂也仕宦之人有退食對妻子之時而屈伏草土者亦必出而游四方求勝己之友察民物之情僞攬山川形勢奇氣以自壯起居道路羈旅商賈百工技術之數無不欲周知而歸於有用傑一身貧賤此無足怪獨學無所成志識不足以尙人裹足牖下不得與足下諸君子游使心智豁然開朗則又未嘗不以爲恨也立春前後十許日奇寒雪霰閒雷電震耀木介斷折且盡松柏存者可數而得傑獨登翠微峯頂狂叫奇景不覺憂懼交集天意爲此殆欲變人溫飽之氣三千里外作何景象耶聞尊公先生去年歲除舟阻高郵湖中風雪甚惡幾被溺二日鬚髮頓白不審氣力亦且少衰否傑日事尾瑣不敢造次具問左右惟呼名道意南昌彭士望

讀之以爲有嗟峨蕭瑟之致其學與其志皆見是書矣亦工五言
詩若十月七夜懷人云三日吹寒風重陰羣高閣山窗正獨愁夜
雨瀟瀟落挑鐙讀古詩開卷意寥廓又如青天動秋聲白雲如水
長十月霜氣寒蕭蕭滿山庭曉風吹獵騎春燒接平蕪雪晴千嶂
曉風動一窗虛獨寐不曾慣秋聲分外多赤石黃花節清秋濁酒
杯皆可誦也父祥遭寇難世傑夜行八十里往視殮畢拔佩刀自
刺爲人所持乃奮拳搥胸腹遂患血結目終日上視僂不能立踰
二十日竟卒子二家桂家棟其梓室文集六卷則叔禧所定也崑
繩名源字汲公叔子稱其文多法史漢有項籍論縱橫馳騁前無
古人嘗論詩曰詩有真者有僞者有不及僞者真者尙已僞者不

及真者然優孟學叔敖則叔敖之衣冠存也使自替其衣冠則藍縷之優孟而已譬人不見真山水畫中山水亦足以自娛今人詆訶七子而言之無物庸鄙粗啞所謂不及僞者似矣

右文獻徵存錄錢林撰

吳紹宗

孝子姓吳名紹宗字二璧江西新城人性敏善屬文弱冠補諸生第一屢試輒高等父道隆病久之痺不能起前後血並下醫藥十餘年罔效康熙戊午正月病甚孝子惶恐無所出乃齋沐焚香告天地刺血書疏將謁大華山自投捨身崖代父死大華山者撫州崇仁縣名山也距新城三百里相傳神最靈異諸來謁者有罪輒被禍不得上甚則有靈官擊殺之同行人聞鞭聲錚然或忽狂病自道生平隱隱而神殿左有懸崖陡絕曰捨身崖人情急不欲生者則擲身投之頭足盡破折死孝子既告天作疏獨身行二日至山上宿道士管遜吾寮同寮宿者南昌鄉先生二人同郡邑諸生

二人十八日孝子入廟默禱焚疏訖同寮人邀游著棋峯路經捨身崖孝子忽越次前行至崖所歛然投身下同行人驚絕不知所爲一時傳駭聚觀者千人道士趨買棺往就殯自山頂至崖下路紆折四十里而殿上道士急奔崖所呼眾人曰誰云吳秀才投崖死者今方在神座下叩頭僞冠服如故眾走視之果然方孝子之自投也立空中不墜開目視足下有白雲起遙望見石門門上一大孝字俄見三神人命之曰孝子吾左側石有仙篆九十二畫汝謹識之歸書紙食汝父不特卻疾且延年更授治痢瘡驅瘟咒並諸篆孝子叩頭謝畢身已在殿上孝子乃言吾如夢中也遂馳歸一日有半而至家至則父垂絕孝子急書一篆焚服之室中皆聞